

Preparads per il cas d'urgenza

Era en il chantun Grischun sa derasa il coronavirus a moda rasanta en tut las regiuns

CUN RUDOLF LEUTHOLD
HA MARTIN CABALZAR DISCURRÌ

■ **Per dar damogn a la derasaziun dal coronavirus era èn noss chantun, ha la regenza installà in stab da crisa e realisà ina plattafurma da comunicaziun che po vegnir consultada sin www.coronavirus-comm.** La Fundaziun Medias Rumantschas ha discurrì cun il schef da l'Uffizi chantunal da sanadad, *Rudolf Leuthold* davart la situaziun actuala e davart las mesiras pridas en mira.

Quantas persunas infectadas datti actualmain en il chantun Grischun e quantas persunas èn actualmain ospitalisadas, e quantas cureschan ora la grippa da corona a moda isolada a chasa?

Primarmain èsi da constatar che la Svizra n'ha betg decretà da far tests generalis per tut las persunas cun simptoms da malsogna dals organs da respiraziun, mabain che tals tests vegnan fatgs mo tar las gruppas da ristg. Quai munta ch'il dumber total da persunas infectadas en il chantun Grischun n'è betg enconuschents. Stersas avevan nus registrà 266 persunas cun in test positiv en il chantun Grischun, da quellas eran 27 persunas ospitalisadas. Las cifras actualisadas pon mintgamai vegnir consultadas sin <https://www.gr.ch/DE/institutionen/verwaltung/disg/ga/coronavirus>.

Quants tests da corona èn vegnids fatgs fin quà en il chantun Grischun?

Il Chantun na dispona betg d'infurmaziuns davart ils tests ch'èn vegnids fatgs cun in resultat negativ. Consequentmain na po il dumber total da las persunas che han fatg il test betg vegnir erui.

Datti era gia persunas infectadas tranter ils medis ed il persunal da tgira?

Per amur da la protecziun da datas da las persunas pertugadas na dat il chantun naginas autras infurmaziuns davart ils cas che èn vegnids testads positiv. Nus engraziain per Vossa chapientscha per questa decisiun.

Quants letgs d'ospital datti insumma en il Grischun e quants letgs pon ins metter a dispusiziun supplementarmain en il seracass?



Il schef da l'Uffizi chantunal da sanadad ha dà pled e fatg a la FMR.

Il chantun Grischun dispona tut en tut da radund 600 letgs d'ospital. En cas d'urgenza pon ins metter a dispusiziun radund 1000 letgs.

Fin 1000 letgs disponibels

En l'ordinaziun davart Covid-19 ha la Confederaziun decretà ch'igl è scumandà ad instituziuns da sanadad sco ospitals e clinicas, praticas da medis e dentists, da realisar actualmain controllas medicinalas, tractaments e terapias (art. 10a) che n'èn betg urgentmain necessarias. Uschia duain tants letgs sco pussaivel star a dispusiziun a persunas pertugadas acutamain dal coronavirus.

Pertge han ins insumma serrà e demontà avant intgins onns ils anteriurs ospitals militars cumplet equipads che avessen survì fitg bain en tals cas excepziunals?

L'aboliziun dals anteriurs ospitals militars è chausa da la Confederaziun, consequentmain stuess ins era tschentà las dumondas correspundentas a la Confederaziun.

Las instituziuns da tgira sa lamentan gia uss ch'ellas sajan al limit cun lur capacitads da persunal. Datti in'obligaziun legala da s'annunziar per persunas medicinalas ni da tgira che na lavuran dentant actualmain betg pli en lur professiun?

Mancanza da persunal da tgira

La regenza ha lantschà gia l'emna passada in appel. La comunicaziun correspundenta sut <https://www.gr.ch/DE/Medien/Mitteilungen/MMMStaka/2020/Seiten/2020032001.asp>

Quantas persunas èn gia s'annunziadas?

Annunzias entran uss cuntinuadamain, ed ins è actualmain lundervia d'examinar en tge instituziuns che las persunas annunziadas pon vegnir engaschadas il meglier.

Per il sustegn da la sparta da sanadad han ins era mobilisà parts da la protecziun civila. Quantas persunas èn engaschadas actualmain e nua

vegnan ellas plazzadas principalmain?

Actualmain èn passa 100 commembras e commembers da la protecziun civila en acziun, cunzunt a favur da las instituziuns che s'occupan da la sanadad. Quai èn ospitals, chasas da vigls e tgira e la spitex. Plinavant furman persunas da la protecziun civila in element central dal post e da la plattafurma da comunicaziun Coronavirus-com. En acziun è era in pitschen detaschament da la polizia da schurmetg civil per sustegnair la polizia chantunala.

Il chantun Grischun ha era tschentà ina dumanda per sustegn al militar. Vegnan era questas persunas a sustegnair la sanidad publica?

Sustegn subsidiar da l'armada

Duess il chantun Grischun la finala obtegnair il sustegn da l'armada svizra, vegn questa truppa era engaschada tant sco pussaivel a favur da la sanadad publica. Da principi è il sustegn subsidiar tras l'armada era pussaivels en autras spartas sco per exempel en la sparta da segirezza. Il chantun Grischun ha dentant dumandà fin quà sulettamain per in sustegn sin champ da la sanadad en il cas d'urgenza.

Co statti cun la cooperaziun interchantunala sche las capacitads dal chantun Grischun na vessan betg da tanscher?

Ins po sortir dal fatg che la Confederaziun surpiglia, sche quai fa da basegn, la coordinaziun interchantunala.

Tenor tge criteris vegnan priorisà ils pazients en cas chi dat mancanza da plazs en ils ospitals?

La SAMW, l'Academia svizra da las ciencias medicinalas ha relaschà directives per ina triascha sin las staziuns intensivivas en tals cas. Quellas directives pon ins consultar sin <https://www.samw.ch/de.html>